

傷寒貫珠集

(三)

張仲景傷寒論貫珠集目錄卷三

辨列陽明條例大意

陽明正治法第一 計五十條 方四道

陽明府病證十二條

調胃承氣湯證四條

小承氣湯證二條

小承氣湯方

大承氣湯證九條

大承氣湯方

白虎加人參湯證三條

陽明經脈因證治十一條

陽明病風寒不同證治九條

吳茱萸湯方

張仲景傷寒論貫珠集卷之三

飢鶴山人尤怡在涇註
二然朱陶性校

陽明上篇

辨列陽明條例大意

太陽病從外入是以經病多於府病若陽明則府病多於經病以經邪不能久留而府邪常聚而不行也故仲師以胃家實爲陽明正病本篇先列府病於前次列經病于後遵先聖之法也而經病有傳經自受之不同府病有宜下宜清宜溫之各異詳見各條要皆不出爲正治之法也此爲上篇凡

五十條其次則爲明辨法蓋陽明以胃實爲病之
正以攻下爲法之的而其間有經府相連虛實交
錯或可下或不可下或可下而尙未可下及不可
大下之時故有脈實潮熱轉矢氣小便少等辨及
外導潤下等法又其次爲雜治法謂病變發黃畜
血諸候非復陽明胃實及經邪留滯之時所可比
例或散或下所當各隨其證而異其治者也此爲
下篇凡三十三條

陽明正治法第一

陽明府病證十二條

陽明之爲病胃家實也

胃者彙也水穀之海爲陽明之府也胃家實者邪熱入胃與糟粕相結而成實非胃氣自盛也凡傷寒腹滿便閉潮熱轉矢氣手足濇濇汗出等證皆是陽明胃實之證也

問曰病有太陽陽明有正陽陽明有少陽陽明何謂也答曰太陽陽明者脾約是也正陽陽明者胃家實是也少陽陽明者發汗利小便已胃中燥煩實大便

難是也

太陽陽明者病在太陽而兼陽明內實以其人胃陽素盛脾陰不布屎小而鞭病成脾約於是太陽方受邪氣而陽明已成內實也正陽陽明者邪熱入胃糟粕內結爲陽明白病活人所謂病人本穀盛氣實是也少陽陽明者病從少陽而轉屬陽明得之發汗利小便津液去而胃燥實如本論所謂傷寒十餘日熱結在裏復往來寒熱者與大柴胡湯是也此因陽明之病有是三者之異故設爲問答以明之而其爲胃家實則一也

問曰陽明病外證云何答曰身熱汗自出不惡寒反惡熱也

問曰病有得之一日不發熱而惡寒者何也答曰雖得之一日惡寒將自罷卽自汗出而惡熱也

問曰惡寒何故自罷答曰陽明居中土也萬物所歸無所復傳始雖惡寒二日自止此爲陽明病也

經邪未變故惡寒入府則變熱而不寒經邪不能聚故傳入府則聚而不傳曰萬物所歸者謂邪氣離經入府聚而不行如萬物之歸於土也是以惡寒爲傷寒在表之的證惡熱爲陽明入府之的證

始雖惡寒不久卽止豈若太陽始終有寒者哉此
三條並論陽明受病之證也

問曰何緣得陽明病答曰太陽病發汗若下若利小
便此亡津液胃中乾燥因轉屬陽明不更衣內實太
便難者此名陽明也

胃者津液之府也汗下利小便津液外亡胃中乾
燥此時寒邪已變爲熱熱猶火也火必就燥所以
邪氣轉屬陽明也而太陽轉屬陽明其端有二太
陽初得病時發其汗汗先出不徹因轉屬陽明者
爲邪氣未盡而傳其病在經此太陽病若汗若下

若利小便亡津液胃中乾燥因轉屬陽明者爲邪
氣變熱而傳其病在府也此陽明受病之因也

傷寒四五日脈沉而喘滿沉爲在裏而反發其汗津
液越出大便爲難表虛裏實久則譫語

脈沉病在裏也喘滿因滿而爲喘病之實也傷寒
四五日病在裏而成實法當攻裏而反發其汗津
液外亡腸胃內燥大便爲難所必然矣表虛裏實
亦卽表和裏病之意久則譫語者熱氣乘虛必歸
陽明而成胃實也

脈陽微而汗出少者爲自和也汗出多者爲太過陽

脈實因發其汗出多者亦爲太過太過爲陽絕於裏
亡津液大便因鞭也

脈陽微者諸陽脈微卽正之虛也故汗出少者邪
適去而正不傷爲自和汗出多者邪雖却而正亦
衰爲太過也陽脈實者邪之實也然發其汗出多
者亦爲太過爲其津亡於外而陽絕於裏也夫陽
爲津液之源津液爲陽之根汗出過多津液竭矣
陽氣雖存根本則離故曰陽絕陽絕津亡大便焉
得不鞭耶

脈浮而芤浮爲陽芤爲陰浮芤相搏胃氣生熱其陽

則絕

脈浮爲盛於外脈芤爲歉於內浮爲陽謂陽獨盛也芤爲陰謂陰不足也浮芤相搏陽有餘而陰不足也胃液枯竭內虛生熱雖有陽氣無與爲偶亦如上條之意也故曰其陽則絕以上三條乃因陽明受病之因而申言之其下三條則申言陽明受病之證也

傷寒發熱無汗嘔不能食而反汗出濇濇然者是轉屬陽明也

傷寒轉繫陽明者其人濇濇然微汗出也

發熱無汗爲太陽病在表嘔不能食者邪欲入裏而正氣拒之也至汗出濺濺則太陽之邪陽明已受之矣故曰轉繫陽明太陽寒在皮毛腠理閉塞故無汗陽明熱在肌肉腠開液泄故濺濺然汗自出也

病人不大便五六日繞臍痛煩燥發作有時者此有燥屎故使不大便也

熱結陽明爲不大便五六日爲繞臍痛煩燥發作有時皆燥屎在胃之徵有時謂陽明王時爲日晡也陽明燥結不得大便意非大承氣不爲功矣

調胃承氣湯證四條

太陽病三日發汗不解蒸蒸發熱者屬胃也調胃承氣主之

發汗不解邪不外散而欲內傳爲太陽而之陽明之候也蒸蒸發熱者熱聚于內而氣蒸於外與太陽邪鬱於外而熱盛於表者不同故彼宜外解此宜清裏也然無燥實等證則所以治之者宜緩而不宜急矣調胃者調其胃氣返于中和不使熱盛實氣而劫奪津氣也

調胃承氣湯方見太陽權變法

傷寒十三日不解過經譫語者以有熱也當以湯下之若小便利者大便當鞭而反下利脈調和者知醫以丸藥下之非其治也若自下利者脈當微厥今反和者此爲內實也調胃承氣湯主之

此亦邪氣去太陽而之陽明之證過經者邪氣去此而之彼之謂非必十三日不解而後謂之過經也觀少陽篇第二十條云太陽病過經十餘日又本篇第六十一條云此爲風也須下之過經乃可下之則是太陽病罷而入陽明或傳少陽者卽謂之過經其未罷者卽謂之併病耳譫語胃有熱也

則熱當以湯下之若小便利者津液偏滲其大便
必鞭而反下利脈調和者醫知宜下而不達宜湯
之旨故以丸藥下之非其治也脈微厥脈乍不至
也言自下利者裏氣不守脈當微厥今反和者以
其內實雖下利而胃有燥屎本屬可下之候也故
當以調胃承氣湯下其內熱 此條太陽篇移入
陽明病不吐不下心煩者可與調胃承氣湯

病在陽明既不上湧又不下泄而心煩者邪氣在
中土鬱而成熱也經曰上鬱則奪之調胃承氣蓋
以通土氣非以下燥屎也

傷寒吐後腹脹滿者與調胃承氣湯

吐後腹脹滿者邪氣不從吐而外散反因吐而內陷也然脹形已具自必攻之使去而吐後氣傷又不可以大下故亦宜大黃甘草芒硝調之俾反於利而已設遇庸工見其脹滿必以枳朴爲急矣

小承氣湯證二條

太陽病若吐若下若發汗微煩小便數大便因鞭者與小承氣湯和之愈

若與或同病在太陽或吐或下或汗邪仍不解而微煩邪氣不之表而之裏也小便數大便因鞭